

絲絲講場：羅傑斯揚言移民台灣

一向對中國大陸市場情有獨鍾嘅「商品大王」羅傑斯，除咗係投資方面睇好大陸之外，更身體力行。事關呢個廿四孝老實，為咗讓個寶貝女學好中文，之前不惜舉家搬到新加坡居住，話貪嗰度空氣好、居住環境又舒服，最重要當然係華語社會啦！不過，最近佢又蠢蠢欲動想再搬屋，而今次的地點就係台灣。

佢話，而家台海情勢和平，雖然六個星期前先第一次投資台股，但尋日應邀去台灣演講時，已經「賣口乖」話覺得台灣呢個地方有更好嘅「中文環境」。而且台灣總統大選後，兩岸關係漸露曙光，連以前擔心發生戰爭嘅疑慮都無埋，所以未來幾年話唔定會在台灣定居㗎！

其實，羅傑斯為咗令佢嘅下一代學好中文，佢個大女一早已經學習普通話，依家生咗第二個寶貝，雖然只得幾個星期大，但就已經搵咗一名會講中文嘅保母，因為佢話希望可以令個細女自然學會英文同中文兩種母語，「中文是我未來能給她最重要的技能！」羅傑斯好認真咁同絲絲講。

余絲韻